

Protocol da la radunanza generala dals 7 december 2017, a las 20.30 illa chasa cumünala Misoch

Tractandas

1. salüd dal president e s-chüsas
2. tscherna scrutinadurs
3. prelecziun dal protocol da la radunanza generala 2016
4. rapport annual dal president
5. infuormaziun davart las lavurs da mantegniment chamonna Cuvel da l'Iva
6. rapport da la chaschiera e dals revisurs da quint
7. rapports dal schef da cuorsa, schef da turas, delegià Traversada e Stafetta tras Sent
8. mutaziuns ed onurificaziuns
9. tschernas
10. fixar contribuziun annuala
11. program da l'on
12. sguard inavo sün divers arrandschamaints ed activitats da nos club
13. varia

1. salüd dal president e s-chüsas

A las 20.35 po il president Christian Poo salüdar a 31 commembers (inscrits illa glista da preschentscha). S-chüsats Roland Staub, Sabine Kaufmann, Monika Roner, Lilo Mock, Cristina Gregori, Corinne Tschalär, Chasper Buchli, Duri Valentin, Dominique Benderer, Conrad Benderer, Maja Bischoff, Men Bischoff, Silvia Theiner, Fluri Pinggera, Roland Franziscus, Anna Barbla Buchli, Duri Vital e Domenic Bass.

L'invid es gnü tramiss tenor statüts, uschè cha la radunanza es abla da trar decisiuns.

La radunanza s'adozza per ün minut da silenzi in memoria da Claudio Werro chi'ns ha stuvü bandunar bler massa bod.

2. tscherna scrutinadurs

Sco dombravuschs vegn elet Marco Laurent.

3. prelecziun dal protocol da la radunanza generala 2016

Il protocol da la radunanza generala 2016 es gnü tramiss insembel cul invid. El vain approvà sainza cuntravuschs.

4. rapport annual dal president

Il president rapporta davart l'inviern passa. Al principi da l'inviern esa stat fich chod ed ingüna naiv. Quista situaziun as repetta adüna plü suvent. Quai demuossa cha hoz nu füssa plü pussibel in nossa regiun da far pistas e loipas sainza naiv artificiala. Las megldras relaziuns haja dat pür a partir da la mità da marz, cur chi'd es gnüda amo üna jada üna naiv plü gronda.

Listess as haja pudü far differents arrandschamaints: la joslada oura Vastur es gnüda realisada, però be sainza schlitra in fuorma da spassegiada, la gita sü Niruns, las cuorsas dal club ed il passlung da clergluna a Sur-En. Gitas da skis nun han pudü gnir realisadas ningünas quist on. Commembers dal club han sustgnü pro lavurs per duos occurrenzas regionalas da ski alpin, al passlung Martina – Scuol ed a la Stafetta tras Sent. Grond plaschair ha'l gnü chi s'ha pudü cuntinuar culla fabrica da la chamonna Cuvel da l'Iva. Il post in

ocasiun da la festa da fusiun es eir stat alch tuot special. Plünavant ha gnü lö darcheu la Stafetta e la Traversada dal territori da Sent.

El ingrazcha a tuot ils voluntaris chi'ns sustegnan adüna pro arrandschamaints. Ün ingrazchamaint va eir als sponsurs chi'ns sustegnan adüna darcheu cun premis o oters lavurs. Plünavant ingrazcha el eir a tschels commembers dal comitè ed a Roland Franciscus sco tempader. El as giavüschess chi dess a la fin darcheu ün inviern cun blera naiv e spera natüralmaing eir chi nu capitan ningüns accidaints.

5. infuormaziun davart las lavurs da mantegnimaint chamonna Cuvel da l'Iva

Il president dà ün pêr infuormaziuns davart las lavurs da mantegnimaint dal Cuvel da l'Iva. Per el esa important dad orientar davart la situaziun finanziaria e dals cuosts da material chi s'ha gnü cul fabricat. Orientaziuns specificas vegnan lura dattas illa tractanda 12. Dal 2016 s'haja investi CHF 3128.45. Pel 2017 d'eira gnü dumandà ün credit da CHF 3000. Finalmaing s'haja investi CHF 3547.70. Uschè s'haja gnü totalmaing cuosts da CHF 6676.15. El appellescha a la radunanza d'acceptar il rendaquint.

6. rapport da la chaschiera e dals revisurs da quint

Quist on serrà giò il quint cun üna perdita da CHF 496.15. Il chapital agen importa uossa CHF 21'058.20. Quista perdita nu fa però rumpatesta. Ella es d'attribuir a las lavurs da mantegnimaint da la chamonna Cuvel da l'Iva chi importan bundant CHF 3500. Sainza quist import füssa stat ün bun on cun ün grond guadogn. Allegraivel sun statta las entradas da CHF 1207.15 per evenimaints, da CHF 1054.90 pell'ustaria in Plaz e la contribuziun da CHF 1'500 chi's survain nouv dal cumün. Quist import es uschè ot causa il grond nomer da commembers e la grond'actività dal club.

Ün ingrazchamaint special va als sponsurs chi contribuischan minch'on vi da premis per las cuorsas.

Ils revisurs da quint Duri Valentin e Chasper Buchli han revais il quint. Quel vain fat bun cun dar dis-charg als organs respunsabels.

7. rapports dal schef da cuorsa, schef da turas, delegià Traversada e Stafetta tras Sent

Il schef da cuorsa rapporta a regard las cuorsas dal club. Il passlung da not ha gnü lö a Ftan pervi da la paca naiv. I s'han partecipadas 17 persunas al passlung, 20 al slalom e 27 al slalom gigantesc. 8 famiglias han fan part a la cumbinaziun. I füss flot schi's rivess da motivar amo a daplüs uffants da's participar a quistas cuorsas. La pista pellas prosmas cuorsas dal club es reservada. Plünavant ingrazcha el pel sustegn chi s'ha per organisar quistas cuorsas.

Il schef da turas, Andri Poo po comunicar chi nu s'haja pudü far d'urant l'inviern passà ningünas turas. Publichadas füssan statta duos turas. La prüma jada d'eira il privel da lavinas sül s-chalin 4 ed i s'ha stuvü clomar giò la tura, la seguonda jada ha l'ora fat ün strich tras il quint e nun ha permiss da far la tura. Quist inviern ha'l darcheu previs da far duos gitas. Las datas provisoricas sun publichadas sül plan da l'on. In cas da spostamaints gnissan quels publichats illa chaistina chi's rechatta dadaint l'entrada dal Sport Champatsch.

Georg Buchli ha fat part dal 2017 per l'ultima jada al comitè da la Traversada ed ha rafüda ufficialmaing. Armon Nuotclà dà las orientaziuns davart l'arrandschamaint. I s'ha pudü dar alloggi a sur 100 participants, in Fenga ed illa chamonna Sesvenna e Pforzheim. Allegraivel es la situaziun cha tuot quels chi sun partits in Fenga sun eir rivats illa chamonna Sesvenna e quai cun ora da bellezza. Dal 2018 ha darcheu lö la traversada da la chamonna Oberettas illa chamonna Sesvenna. El ingrazcha a Georg Buchli per tuot seis ingaschamaint d'urant tuot quists ons.

Nataglia Caviezel rapporta davart la 34avla Stafetta tras Sent. Quella ha funcziunà fich bain, eir causa il sustegn da Tina Weiss e Christian Poo cul team da l'ustaria. In tuot s'han partecipadas 13 squadras, 35 uffants e 30 creschüts. La prosma stafetta varà lö in gün, la data vain fixada plü tard.

8. mutaziuns ed onurificaziuns

Sco novs commembers vegnan bivgnantadas las seguintas personas: Andi e Sibylle Ovenstone, Clot Felix e Lilo Mock.

Sortidas nun haja dat ningünas. Claudio Werro ans ha displaschaivelmaing bandunà per adüna.

Peder Poo survain duos ons massa tard la medaglina da 25 ons commember dal club da skis, pervi d'ün sbagl pro la calculaziun. Plünavant vain onurifichà eir Domenic Augustin sco commember veteran cun quai ch'el fa part 25 ons al club da skis da Sent. Domenic Bass dvainta commember liber causa sia commembranza da 40 ons Club skiunzs Sent. Ad els trais pertocca sinceras gratulaziuns.

9. tschernas

Tenor statüts ston gnir elets d'ürant ils ons dispèrs l'actuar e'l schef da cuorsa. Quels as mettan darcheu a disposiziun e vegnan reelets cun applaus

Uschè as cumpuona il comitè inavant seguaintamaing:

president:	Christian Poo
actuar:	Mario Rauch
chaschiera:	Martina Weiss
schef da cuorsa:	Jon Buchli
schef da turas:	Andri Poo
revisurs da quint:	Duri Valentin e Chasper Buchli

10. fixar contribuziun annuala

La contribuziun annuala vain fixada sün 25.- fr. per personas sainza commembranza da Swiss-Ski. Ils commembers cun commembranza da Swiss-Ski pajan 50.- fr.

11. program da l'on

Il program da l'on es gnü protramiss e vain preschantà dal president. El manzuna chi's vögla organisar quist on invezza da la joslada oura Vastur ün inscunter cun giovar a tschoccas ed üna pitschna tschaina a Sur-En. Implü han lö quist on als 3 e 4 favrer las maestranza grischunas da passlung ed ils 10 marz üna cuorsa dad assa da la coppa mundiala. Ils organisaturs gnaran invers commembers a dumandar pel sustegn pro quistas occurrenz.

12. sguard inavo sün divers arrandschamaints ed activitats da nos club

Il president manzuna chi s'haja fini la renovaziun dal Cuvel da l'Iva. El ingrazcha a tuot las dittas chi han sustgnü cun lavur gratuita o cun cundiziuns plü favuraivla o cun ulteriuras donaziuns: Plasch Caviezel cun blera lavur, üsaglias e sco perit da la fabrica, Andri Taverna cun duos fanestras, Andrea Buchli cun culur, Pratcha Christoph Weiss cun surtrattas da fieuter pels bancs, Chasper Ruben cun cundiziuns favuraivlas e lavur gratuita, Anna Barbla e Not Buchli cun duos pels da bescha, Marco Laurent e Hanin Salomon cun preparaziun da lainom, Cristina Gregori cun üna surtratta per las sopchas, Pendericas Motta Naluns cun transports, Klaus Bösch, Antonin Hugentobler e Christian Hännny cun metter a disposiziun lur veiculs, Jon Peder Cantieni cun metter a disposiziun d'ürant gronds temps üna regia cun accu, Andri Gritti cun digitalisar fotografias, Cla Sarott cun metter a disposiziun fotografias veglia e surdar üna DVD cun ün film realisà cun el dad Ernest Vital e fich bleras personas chi han sustgnü cun lavur cumüna. Ün grond grazcha fich va eir seis collegas da suprastanza chi han prestà üna gronda lavur e contribui vi da material ed üsaglias.

A man d'üna preschantaziun da powerpoint spieghescha il president tuot l'andamaint da la fabrica. A la fin da la preschantaziun surdà Tina Weiss al president ün pitschen preschaint e manzuna tuot seis ingaschamaint. D'ürant l'ultim on sarà stat Christian bod tuot seis temp liber fatschendà cun lavurs pel cuvel da l'Iva. El es stat: planisader, coordinatur d'incumbenzas, falegnam, marangun, manader da fabrica, recrutader d'agüdants, ... Eir sias vacanzas sun suvent gnüdas planisadas tenor lavurs sülla chamonna.

La radunanza fa ün applaus chi düra plüs minuts e muossa uschè fich grond respet per tuot l'ingaschamaint dal president.

13. varia

Ils manaders da l'OJ Marlies Zimmermann, Curdin Preuss (alpin) e Dominique Benderer ed Armon Nuotclà (nordic) survegnan ün pitschen regal in per lur ingaschamaint pel sport da giuvenils sco manaders da l'OJ.

Il president rapporta cha ill'organisaziun da promoziun da sport d'inviern da la regiun dal Parc Naziunal nun haja dat gronds müdamaints. El nun ha pudü as partecipar quist on a la radunanza generala.

Nos actuar Mario Rauch orientescha davart ils müdamaints i'l comitè d'organisaziun dal Passlung Martina – Scuol. Davo la desditta da Reto Barbüda, Riccardo Nesa, Anna Mathis e Mario Rauch han surtut las seguintas persunas quistas caricas: Jachen Bass (schef da cuorsa), Marianne Werro (actuariat) ed Andrea Florinett (finanzas). Els vegnan amo sustgnüts da Tinetta Strimer (contact culla TESSVM). Christian Poo ingrazcha a Mario per sia gronda lavur prestada d'urant tuot ils ons a favur dal Passlung.

Mario Riatsch ingrazcha fich pella bella reuschida da la chamonna dal Cuvel da l'Iva e tira attent cha forsa pudess il club depuoner pro'l cumün chi nu sajan allontanats ils fils da saivs, adonta cha tenor uorden champester nu pudessan uschè fils be gnir laschats giò per terra. Güsta cun paca naiv es quista situaziun fich privlusa per skiunzs, ma eir per bes-chas.

Sch'inchün vess jent da postar ün cudesch da fotografias o fotografias veglias dal cuvel da l'Iva dessa'l s'annunzchar pro'l comitè. Ils exemplars per tour invista sun miss oura sün üna maisa.

Georg Buchli fa ün cumplimaint al comitè per tuot las activitats chi han lö pel mumaint. Tenor el nu s'algorda'l da temps cha'l club d'eira uschè activ. El manzuna eir cha'l club possa esser superbi da la situaziun actuala cha president (Andri Linsel) e directer (Andri Poo) da las Pendericulas Motta Naluns sajan commembers dal Club skiunzs Sent ed eir regularmaing preschaints a las radunanzas generalas, sco chi'd es il cas eir quist on.

Georg Buchli surdà implü ils salüds da la famiglia Pobitzer da la chamonna Sesvenna. Els bandunan la chamonna a la fin da la stagiun d'inviern. Als 5 mai 2018 varà lö üna festina da cumgià illa Sesvenna.

Il president manzuna cha sülla chamonna dal Cuvel da l'Iva saja eir ün fögl cun sü ün pèr reglas davart l'adöver da quella. Cun quai chi nun es amo scholt ün problem cun aua chi cula giò dal grip e riva in chamonna, giavüscha'l chi nu gnia pernottà e s-chodà la chamonna sur ün lung temp d'urant l'inviern. L'adöver da la chamonna es pussibel, intant però be per far il caffè / tè. In chamonna es eir ün cudesch da chamonna ed üna chaschina per contribuir alch schi's fa adöver da la chamonna. Ils cuosts da laina ed oter dessan gnir cuernats uschea.

Andri Poo surdà a Tina Weiss ün pitschen regal per tuot seis sustegn. Ella es la bun'orma dal comitè chi pissera adüna cha'ls homens dal comitè stettan bain. Andri quinta üna pitschna anecdota chi s'ha gnü in occasiun da la tschaina da comitè chi s'ha pudü organisar quist on sü'l Cuvel da l'Iva. Per ella d'eira cler eir chi s'ingrazcha al rest dal comitè pella buna collavuraziun e'l sustegn e daiva adüna a no ün bel regal in cun üna chartina persunala, da nossa vart nu gniva mai nöglia. Uschè s'ha ella adüsada cha homens engiadinais dan adüna inavant ils „ingrazchamaints sainza peds“. Quista jada ha Andri fat quist uossa eir cun peds.

A las 22.15 serra il president la radunanza ed ingrazcha a la chaschiera pella marendina e l'ustaria ch'ella ha preparà. Davo la radunanza vain muossada amo üna bella contribuziun da film gnüda realisada da Cla Sarott in occasiun dal giubileum da 75 ons Club skiunzs Sent.

L'actuar

Mario Rauch